



de Solde public, de Pourcentage vum PIB, dee mer a Recherche-Développement investéieren, eis Produktivitéitsrechnungen, et cetera.

Dat heescht ganz kloer: Et bleift natierlech als éischt Prioritéit bei deem normale PIB. Mä de PIB du bien-être, dee wäert deemnächst kommen. Voilà, Merci villmools.

► **M. Mars Di Bartolomeo**, *Président*. - Merci och dem Här Minister.

11. Changement de composition d'une commission parlementaire

Ier mer zu der Proposition de loi iwwert d'Organisatioun vum Referendum iwwerginn, wollt ech der Chamber nach eng kuerz Matdeelung maachen. Op Demande vun der Fraktioun vun deene Gréngen ass ugefrot ginn, fir den Här Claude Adam all Kéier fir de Punkt vum Projet de loi 6675 duerch d'Madame Viviane Loschetter ersetzen ze loossen, ob d'Chamber domat d'accord ass?

(Assentiment)

Merci. Dann ersetzt bei deem dote Punkt an Zukunft d'Madame Loschetter den Här Claude Adam. Villmools Merci.

Mir géifen dann iwwergoen zu der Proposition de loi iwwert d'Organisatioun vum Referendum vum 7. Juni. An d'Wuert huet direkt de Rapporteur a Coauteur, den Här Alex Bodry.

12. 6738 - Proposition de loi portant organisation d'un référendum national sur différentes questions en relation avec l'élaboration d'une nouvelle Constitution

Rapport de la Commission des Institutions et de la Révision constitutionnelle

► **M. Alex Bodry** (*LSAP*), *coauteur-rapporteur*. - Här President, Dir Dammen an Dir Hären, bei dësem Gesetzesvorschlag, deen ech de 4. November d'lescht Joer zesumme mat der Kolleegin Viviane Loschetter a mam Kolleeg Eugène Berger an der Chamber abruecht hunn, geet et drëm, fir dës 7. Juni en nationale Referendum iwwer verschidde Froen, déi eis Verfassung betreffen, ze organiséieren.

D'Iddi, op dës wäitreechend an exzeptionell Form vu Biergerbedelegung zréckzegraifen, geet eigentlech op Enn 2012 zréck, wou se fir d'Éischt an d'ëffentlech Debatt bruecht ginn ass.

Dës Iddi, an engem fräie Stadium, also ier den definitiven Text vum Verfassungsentwurf arrétiert ass, d'Wieler zu eenzelne Verfassungsspekter ëm hir Meenung ze froen, ass fir Lëtzebuerg Neiland. An trotzdem huet dës Virschlag vu Biergerbedelegung bei der Ausschaffung vun eiser neier Constitution säi Wee relativ schnell gemaach. Iwwer eenzel Wahlprogrammer ass en an de Koalitionsaccord vun 2013 agefloss.

A well et sech ausschliisslech ëm Verfassungsfroen handelt, déi per Referendum dem Wieler wäerte virgeluecht ginn, ass et och net un der Regierung, mä um Parlament, als Pouvoir constituant, fir an dësem Beräich d'Initiative ze huelen. Dat hu mer gemaach. An doduerch diskutéiere mer haut net iwwer e Gesetzesprojet vun der Regierung, mir diskutéieren iwwer eng Proposition de loi, déi vun Deputéierten hei an der Chamber abruecht ginn ass.

Dës Gesetzesvorschlag Bodry-Berger-Loschetter ass an der zoustänneger Chamberskommission net nëmmen debattéiert ginn, mä och am Virfeld, ier den Dépôt stattfonnt huet, virbereet ginn. D'Majoritéitsparteien hu véier Froevirschlë agereecht. An déi aner Fraktiounen a Parteien, déi an der Chamber vertratt sinn, sinn offiziell a schrëftlech opgefuerdert ginn, eege Verfassungsfroevirschlë fir dës Referendum anzerechen.

D'CSV an d'ADR hunn aus prinzipiellen Ursachen dat ofgelehnt. An déi Lénk hunn eege Propositionen erabruecht, déi awer bei deenen anere Fraktiounen a Sensibilitäten an der Kommission keng Ennerstëtzung fonnt hunn.

Zréckbehalen - dat war de Géigestand vun dem initialen Text vun der Proposition de loi - sinn also véier Froen gewiescht. An zwar:

Éischtens, d'Erofsatzung vum allgemenge Wahlalter beim aktive Wahlrecht vun 18 op 16 Joer, an dat op enger fakultativer Basis;

zweetens, d'Opmaache vum aktive Wahlrecht bei Chamberswahlen fir Netlëtzebuurger, an dat ënnert der duebeler Bedéngung, dass d'Leit zéng Joer hei zu Lëtzebuerg gewunnt hunn an och virdru bei Wahlen hei am Land matgemaach hunn;

drëttens, d'Afféierung vun enger Begrenzung vun der Mandatsdauer vu Regierungsmemberen op maximal zéng Joer an engem Stéck,

an, véiertens, d'Ofschafe vun der Verfassungsobligatioun fir de Stat, sämtlech Gehälter a Pensioune vun de Kultusdénge ze droen.

Dës Froen sinn opgrond vun dräi Kritäre festgehale ginn: éischtens d'Verfassungsrelevanz. Et war vun Ufank u kloer, dass dës Referendum am direkten Zesummenhang steet mat der Ausaarbechtung vun enger neier Verfassung fir Lëtzebuerg, a sämtlech Froen hunn also misse Verfassungscharakter hunn.

Zweete Kritär war de kontroverse Charakter vun der Fro. Et ass effektiv relativ beméilech, fir eng Consultatioun vu sämtleche Bierger ze maachen, wann hei am Parlament, am Pouvoir constituant, eng Eestëmmegkeet oder eng Quasieestëmmegkeet besteet, fir op engem Punkt déi bestehend Verfassung ëmzeänneren.

Duerfir hu mer bewusst eigentlech de Choix getraff op Froen, déi kontrovers waren, wou eigentlech am Kader vun der Ausaarbechtung vun enger neier Verfassung weder eng qualifizéiert Majoritéit bestanen huet, fir den aktuellen Text bäizebehalen, nach eng qualifizéiert Majoritéit bestanen huet, fir eng Annerung vum bestehenden Text ze maachen. Dat war den zweete Kritär vun der Auswahl vun deenen dote Froen.

An den drëtten Kritär war dee vun der Onmëssverständlechkeet vun der Äntwert. Et hu misse Froen sinn, déi, wa se per Referendum mat Jo oder Neen eng Äntwert kréien, och domadder tranchéiert sinn, an net Froen sinn, déi eigentlech, wa mer d'Äntwert hunn, herno nach zousätzlech Froen opwerfen an eigentlech de Problem net hëllefe léisen.

Dat waren déi dräi Grondkritären, déi eis derzou bruecht hunn, fir grad déi dote Froen zréckzebehalen, an och aner Froen, déi an der Diskussioun waren, net zréckzebehalen, well déi zumindest engem vun deenen doten dräi Selektionskritären net entsprach hunn.

Dorausser ergëtt sech natierlech och d'Noutwendegkeet, déi Iddien, iwwert déi per Referendum soll ofgestëmmt ginn, verständlechst a méiglechst prezis ze formuléieren. Dem Wieler muss kloer sinn, iwwer wat hien ofstëmmt, an d'Chamber muss herno mat der Äntwert d'Verfassungsfro geléist kréien.

Duerfir ass och am Kader vun eisen Aarbechten an der Kommission d'Optioun festgehale ginn, d'Froen relativ kuerz an einfach probéieren ze formuléieren an net mat ze villen Detailler a Schachtelsätz ze belastschen. Et gëtt iwwer Iddien ofgestëmmt, an net iwwer juristesche bis op dee leschte Punkt a Komma ausgefeilte Verfassungsbestimmungen. Dat kënnen mer am Detail eréischt maachen, wa mer dee gesamte Verfassungstext hunn an och wëssen, wou mer déi eenzel Punkten an der Verfassungstext, deen neie Verfassungstext erabréngen.

Allerdéngs hu mer eigentlech vun den Aarbechten an eiser Kommission och profitéiert, iwwert dee schrëftleche Rapport an haut iwwer mä mündleche Rapport, fir eenzel Interpretationshëllefen ze ginn iwwer e puer Detailpunkten, déi mer och d'Geleeënheet haten, ënner eis ze diskutéieren, fir dass mer eng méiglechst eenheetlech Ausleeung vun deenen dote Froen kréien, an op jidde Fall vereinfachen. Op den Detail kommen ech nach méi spéit zréck.

Ähnlech ewéi de Statsrot dat a sengem Avis gemaach huet, well ech elo awer am nächsten Deel vun dësem mündleche Rapport op e puer méi grondsätzlech Aspekter agoen, déi am Zesummenhang mat deem Referendum ze kucke sinn a bei deenen een och mierkt, dass dobaussen och eenzelner vun deene Punkten haut diskutéiert ginn. Duerfir ass et also wichteg, e puer Froen kloerzestellen.

Fir d'Éischt emol nach eng Kéier, fir op d'Fro zréckzekommen: Firwat eigentlech dës Referendum?

Dës Referendum ass eng eemoleg Chance eigentlech, fir e Prozess vun der Verfassungsrevision, deen elo méi wéi zéng Joer an dësem Parlament leeft, an d'ëffentlech Diskussioun eranzekréien, fir Iddien kënnen auszutauschen, fir kënnen ze debattéieren an de Bierger konkret och un deene Verfassungsarbechte mat ze bedeelegen. Dat ass eis bis elo net gelonge gewiescht. Mir hoffen, dass et mat dësem Referendum méiglech gëtt.

D'Biergerparticipatioun soll sech net op e Jo an en Neen zu engem fäerdege Verfassungstext beschränken, wann all Diskussiounen hei an der Chamber gelaf sinn, wou et dann net méi méiglech ass, och iergend nëmmen e Komma un deem Text ze änneren. Mä et geet hei drëm, dass mer d'Leit méiglechst fréi mat an déi allgemeng Debatt erakréien an domadder och profitéieren, dass eng Rei vu kontroversen Froen och duerch d'direkt Consultatioun vum Bierger eng éischt Äntwert kënnen kréien.

Och an anere Länner - Island an Irland - si se bei hire Verfassungsrevisionen en ähnleche Wee gaange vun enger Préconsultatioun eigentlech vun de Bierger, ier et zu engem defi-

nitiven neie Verfassungstext koun. Firwat soll esou ee Stéck vu méi direkter Demokratie a Verfassungsproben net zu Lëtzebuerg méiglech sinn?

Zweet Fro: Wat ass déi juristesche Grondlag vun deem Referendum?

D'juristesche Grondlag vun dësem Referendum ass den Artikel 51 (7) vun eiser Verfassung, dee seet: «Les électeurs pourront être appelés à se prononcer par la voie du référendum dans les cas et sous les conditions à déterminer par la loi.» D'Gesetz, dat heescht d'Chamber, leet d'Fro fest, déi dem Wieler per Referendum virgeluecht ginn. D'Parlament ass fräi, déi Fro festzeleeën. Do gëtt et keng Aschränkungen.

D'Organisatioun vum Referendum gëtt iwwer en allgemenge Gesetzestext, d'Gesetz vum 4. Februar 2005 iwwer national Referendumen, geregelt, soudass mer bei dësem Spezialgesetz eigentlech just brauche praktesch d'Fro festzeleeën an den Datum vun der Consultatioun.

Dës Referendum ass net ze verwiessele mat dem Referendum, deen am Artikel 114 vun eiser Verfassung virgeschriwwen ass. Do geet et ëm e spezifesche Referendum iwwer eng Ofstëmmung, déi schonn hei an der Chamber stattfonnt huet, wat d'Revisioun vun der Verfassung ueget. An zwar gesäit den Artikel 114 ewell vir - virdrun huet d'Chamber ëmmer misse opgeléist ginn eigentlech, ier et konnt zu enger Verfassungsännerung kommen -, gesäit elo vir, dass am Prinzip zweemol hannereneen d'Chamber, als Constituante, iwwert den Text vun enger Verfassungsrevision ofstëmmt, an dass, nodeem eng éischte Kéier eng Zweedréttmajoritéit vun der Chamber sech hei derfir ausgeschat huet, deen zweete Vote kann ersat ginn duerch eng Direktbefragung vun de Leit, déi dann dee gesamte Prozess ofschléisst.

Et ass also en décisive Referendum, deen an deem dote Kader virgesinn ass. Mä, wéi gesot, e setzt viraus, dass sech virdrun d'Chamber iwwerhaupt iwwer en Text mat qualifizierter Majoritéit eens gesat huet, soss kann déi dote Form vum Referendum net spillen.

Esou e Referendum ass och virgesinn, dass en am Kader vun der neier Verfassung vu Lëtzebuerg soll stattfannen, wann eis Aarbechten zu deem dote Punkt ofgeschloss sinn a wa mer et fäerdegbréngen, op engem neie Verfassungstext hei an der Chamber eng qualifizéiert Majoritéit ze kréien.

Optimistescherweis kéint ee mengen, dass esou eppes scho kéint 2016 de Fall sinn. Ech mengen awer, wann een all déi Aarbechte kuckt, déi mer nach mussen um gesamte Verfassungstext maachen, mat den Navetten am Statsrot, déi mussen stattfannen, och mat Modifikatiounen un eenzelne Gesetzestexter, déi parallel mussen duerchgezu ginn, dass et éischer wahrscheinlech ass, dass mer deen dote Referendum eréischt 2017 kënnen duerchféieren. Firwat net gläichzäitig mat de Gemengerotswahlen am Oktober 2017? Et ass un der Chamber, fir am Endeffekt dat dote mat ze decidéieren.

Drëtt Fro ass: Wien däerf beim Referendum matmaachen a wéi bannend ass den Ausgang vum Referendum?

Déi dote Froen sinn net nei. Déi si bei all Referendum diskutéiert ginn, eng leschte Kéier, fir déi Leit, déi deemools schonn hei waren, 2005, wéi et ëm d'Organisatioun gaangen ass vum Referendum zum Europäesche Verfassungstraité. An d'Äntwerten, déi mer haut ginn, sinn eigentlech keng aner ewéi déi, déi mer virun zéng Joer hei an der Chamber op déiselwecht Froen ginn hunn.

All Referendumen, déi op der Basis vum Artikel 51 (7), fréieren Artikel 52, vun eiser Constitution ofegehale ginn, hunn e konsultative Charakter. Dat heescht, se sinn, streng juristesche geholl, net bannend. Dat war mat alle Referenden de Fall, déi bis elo hei zu Lëtzebuerg duerchgefouert gi sinn.

Dass dat esou ass, steet net an engem normativen Text dran. Et steet weder formal an eiser Verfassung dran nach steet et an dëser Proposition de loi dran. Mä dat ergëtt sech awer duerch eng Interpretatioun, déi d'Doctrine gemaach huet vun eiser Verfassung a besonnesch am Artikel 50, dee seet: «Les députés votent sans en référer à leurs commettants...» Do ass keng Ausnahm virgesinn. Aus deem Saz gëtt ofgeleet, dass eigentlech d'Referendumen, mat Ausnahm vun deem spezielle Referendum am Kader vum Artikel 114, hei zu Lëtzebuerg e konsultative Charakter hunn.

De Statsrot huet seng traditionell Positioun, och an där dote Fro, nach eng Kéier hei rappeliert a sengem Avis. Juristesche net contraignant, huet natierlech den Ausgang vum Referendum e politeschen Impakt, deen een net kann an och net däerf ignoréieren.

Wat bréngt et effektiv, de Wieler ëm seng Meenung ze froen, wann dann den Ausgang vum Referendum net soll respektéiert ginn?

Et ass mir eigentlech, perséinlech, onvirstellbar a wär och, a mengen Aen, konträr zu allgemengen demokratesche Prinzipien.

Ech erlabe mer hei de Pierre Majerus - kee Revolutionär - ze zitieren. De Pierre Majerus, deen a sengem Referenzwierk iwwert den État luxembourgeois an der Versioun vun 1948 Folgendes zu där dote Fro gesot huet - ech zitieren: «Il est évident que le résultat du référendum pèsera chaque fois lourdement dans la balance politique et qu'il sera déterminant dans la plupart des cas, à moins que des circonstances de force majeure n'empêchent le législateur de s'y conformer.» Souwäit d'Meenung vum Jurist Pierre Majerus zu där dote Fro.

Et ass sech och, wann een d'Verfassungsgeschicht vu Lëtzebuerg kuckt, ausnahmslos eigentlech ëmmer un d'Resultat vum Referendum gehale ginn, och wann dat Resultat ganz knapp war. Beispill dozou ass de Referendum iwwert dat sougenannt „Maulkuerfgesetz“ vun 1937, wou eng ganz knapp Majoritéit - 50,7% - Nee gesot huet zu deem dote Gesetz a wou awer d'Majoritéit deemools vun der Chamber dat do respektéiert huet, och wann et knapp war.

Et war just an engem Fall aneschtens, dat war, wat d'Wirtschaftsunion mat Frankräich ueget, wou sech gutt 70% derfir ausgeschat hunn am Referendum 1919, mä wou awer d'Fransousen eigentlech net wollten eng Wirtschaftsunion mat Lëtzebuerg maachen. An do ass dann dem Kapp nogefollegt ginn an net dem Häerz no, a schlussendlech ass eng Wirtschaftsunion mat der Belsch, sengerzäit, ofgeschloss ginn. Dat kann een, mengen ech, mam Cas de force majeure vum Här Majerus hei definéieren.

Wie kann elo mat ofstëmmen?

Do ass och d'Äntwert relativ kloer. D'Recht, fir un engem nationale Referendum deelzehuelen, ass fir de Moment un d'Wahlrecht bei den nationalen Wahlen gekoppelt. Dat ergëtt sech aus der Artikulatioun vun de Verfassungsbestimmungen am Artikel 4 iwwert d'Deputéierte-chamber, wou och déi Dispositiounen iwwert de Referendum drastinn.

Och hei huet de Statsrot seng bekannten Interpretatioun an Erënnerung geruff. 2005 hat e souguer op deem dote Punkt eng Opposition formelle zum deemolege Regierungsvorschlag, wat den Traité européen ueget, ageschriwwen, an d'Chamber huet sech sengerzäit inclinéiert. An duerfir ass et och hei kloer, dass d'Wahlrecht bei dësem Referendum op déi Leit beschränkt ass, déi och d'Wahlrecht bei de Legislativwahlen hunn.

Beim nationale Referendum besteet d'Wahlpflicht. Och dat ass eng Fro, déi een oft gestallt kritt dobaussen. Et besteet d'Wahlpflicht, wéi dat bei politesche Wahlen hei zu Lëtzebuerg de Fall ass. Et ass dat den Artikel 37 vum allgemenge Referendumsgesetz vun 2005, deen dat virschreift. Ech zitieren: «Le vote est obligatoire conformément aux articles 89 et 90 de la loi électorale.»

D'Bréifwahl ass virgesinn, wéi dat bei anere Wahlen och hei zu Lëtzebuerg de Fall ass. An dee leschten Délai, fir d'Bréifwahl unzefroen, dierft hei, wann et soll zum 7. Juni zu engem Referendum kommen, beim 8. Mee dëst Joer leien.

Wéi gëtt d'Resultat bestëmmt?

D'Froen vum Referendum stinn op engem Wahlziedel - op engem Wahlziedel - an déi mussen an deenen dräi offizielle Sproochen ausgedréckt ginn, an der Reiefolleg Franséisch, Lëtzebuergesch, Däitsch, all Kéiers mat zwou Casen, lénks Neen a riets Jo, nieft dem Non an dem Nein an dem Oui an dem Ja.

D'Resultater, déi Fro ass nach gëschter - dat hunn ech matkritt - an enger Sitzung tëschent Parteien opgeworf ginn, ginn determinéiert pro Fro. A bei der Determinatioun vun dem Resultat zielen eigentlech déi ongültig an déi wäiss Ziedelen net. Et ginn eigentlech just kontabiliséiert a géintiwwergestallt déi Leit, déi pro Fro mat Jo a mat Nee geäntwert hunn. Doraus ergëtt sech dann d'Resultat vum Referendum. Dat ass keng Erfindung, mä dat ergëtt sech eigentlech aus den Dispositiounen, wéi se am allgemenge Referendumsgesetz vun 2005 festgehale sinn.

Loosse mer dann elo op déi eenzel Referendumsfroen selwer ze schwätze kommen.

Vun deene véier virgeschloene Froen bleiwen der schlussendlech nach dräi iwwreg. Déi ursprénglech véiert Fro iwwert de staatleche Finanzement vun de Gehälter a Pensioune vun de Kultusdénge fält ewech. Dat ass geschitt, nodeems d'Chamber hei mat grousser Majoritéit eng Resolutioun gestëmmt huet, wou se



dat dote freet, an och virdrun awer en Accord unanime eigentlech bestanen huet, wat nach virun e puer Méint net de Fall war, fir an eng nei Verfassung déi heiteg Bestëmmung vum Artikel 106 iwwert d'Bezuele vun de Gehälter an de Pensioune vun de Ministres des cultes net méi ze iwwerhuelen. Dat war genau de Géigestand vun der véierter Fro.

Doduerjer, dass mer eestëmmeg der Meenung sinn, dass mer esou eng Dispositioun an der neier Verfassung net méi wëlle virgesinn, fällt natierlech déi dote Fro ewech. Well dann eigentlech de Kritär vun der Kontroversitéit vun der Fro, deen ech virdru genannt hunn, och net méi ginn ass, well mer souguer hei op esou enger Fro ewell Eestëmmegkeet hei an der Chamber hunn.

Et bleiwen dräi Froen nach, déi de 7. Juni dem Wieler gestallt ginn. Ech gi ganz kuerz op se an.

Déi éischt Fro ass: Sidd Dir mat der Iddi averstannen, dass d'Lëtzebuurger, déi tëschent 16 an 18 Joer al sinn, d'Recht kréien, sech fakultativ an d'Wielerlëschten anzeschreiwen, fir als Wieler bei de Wahlen fir d'Chamber, d'Europaparlament an de Gemengerot wéi och de Referendume matzemaachen?

Lëtzebuerg huet déi eelste Wahlbevëlkerung an Europa. An ähnlech wéi dat haut an anere Länner wéi Eisträich an eenzelnen däitsche Bundeslänner de Fall ass, gëtt also hei d'Iddi opgeworf, fir fir dat aktiivt Wahlrecht bei alle politesche Wahlen de Mindestalter vun 18 op 16 Joer erofzesetzen. Fir déi jonk Leit besteet allerdéngs direkt keng Wahlpflicht. Si musse sech aschreiwen an déi Wahlleschten. Wa se sech awer dann ageschriwwen hunn, da musse se och wile goen.

Si kréien heimadder net dat passivt Wahlrecht, also d'Recht, fir Kandidat ze sinn, zougestannen. Et handelt sech hei ausschliesslech ëm d'Recht, fir wielen ze goen.

Et schéngt eis selbstverständlech ze sinn, wann herno op déi zweet Fro iwwert d'Ausländerwahlrecht géif mat Jo geäntwert ginn, dass dann an logescherweis déi jonk Netlëtzebuurger ab 16 Joer an de Genoss misste kommen, fir kënnen hei bei Legislativwahlen matzemaachen.

Zweet Fro: Sidd Dir mat der Iddi averstannen, dass d'auslännesch Matbiurger d'Recht kréien, sech fakultativ an d'Wielerlëschten anzeschreiwen, fir als Wieler bei Chamberswahlen matzemaachen, an dat ënnert der besonnescher duebeler Bedéngung, dass se op d'mannst während zéng Joer zu Lëtzebuerg gewunnt hunn a virdru scho bei Gemengen- oder Europawahlen zu Lëtzebuerg matgemaach hunn?

Hei ass also d'Iddi déi, fir, ënner verschiddene Viraussetzungen, den Netlëtzebuurger dat aktiivt Wahlrecht bei Chamberswahlen ze ginn. Zurzäit, an dat wësse mer, si ronn 45% vun den Awunner vun dësem Land Ausländer. Wann deen Trend sech iergendwéi fortsetzt an deenen nächste Joren, wäerten an aacht bis zéng Joer d'Majoritéit vun deene Leit, déi hei wunnen, Netlëtzebuurger sinn. Do stellt sech also eng spezifesch Lëtzebuurger Fro, wat de Fonctionnement vun der Demokratie ugeet, wann eigentlech eng Wahlbevëlkerung just nach eng Minoritéit vun der effektiver Bevëlkerung vun dësem Land ausmécht.

Dës Ouverture vum Wahlrecht ass op dat aktiivt Wahlrecht beschränkt. Et muss een eng Residenzdauer vun zéng Joer opweisen. Allerdéngs kann déi och ënnerbrach gewiescht sinn. Dorobber ware mer eis an der Interpretatioun eens. An duerch d'Matmaache bei Gemengen- an Europawahlen virdru weist ee jo och als Bierger vun engem Land, dass een Interessi huet un der Politik an um gemeinschaftleche Liewen.

Dëst Wahlrecht ass fakultativ, wéi dat och haut de Fall ass bei all Ausländerwahlrecht, wat mer hei zu Lëtzebuerg hunn. Et muss ee sech also an eng Wielerlëscht aschreiwen. A wann ee sech bis an déi Wielerlëscht ageschriwwen huet, da besteet d'Wahlpflicht fir deen Eenzelnen.

Drëtt a lescht Fro an deem heite Referendum: Sidd Der mat der Iddi averstannen, d'Zäit, während där eng Persoun ouni Ennerbriechung Member vun der Regierung därer sinn, op maximal zéng Joer ze begrenzen? Dëst ass an der politescher Debatt hei zu Lëtzebuerg eng relativ nei Iddi, fir eng personell Alternance an eng Erneuerung vun der Exekutiv ze fërderen.

Eise Wahlsystem, dee mer alleguerte kennen, gekoppelt un de System vun de Koalitiounsregierungen, huet zu enger, och am internationale Vergläich, onheemlecher Laangliewegkeet vum politesche Personal bis hin an der Regierung gefouert. Duerch d'Aféierung vun enger maximaler fortwährender Dauer vu Regierungsbedeele-

gung als Minister oder Statssekretär solle personell Verännerunge promouvéiert ginn an eng méiglech Beliewung vun der Demokratie erreecht ginn.

Dës nei Regel, déi, wéinst hirem Impakt op d'politesch Rechter an och op d'Ernennungskompetenz vum Statschef, muss an der Verfassung verankert ginn, gëllt nëmme fir d'Regierung. Si gëllt net fir d'Chambersmemberen. A si kann och, juristesche gesinn, net réckwierkend applizéiert ginn. Ech hunn awer Notiz dovunner geholl, dass dës Regierungsmembere schonn deklaréiert hunn, dass si bereet wäeren, fir sech selwer déi doten Dispositioun, wa se sollt iwwerholl ginn, dann ab dem éischten Dag vun hirem Mandatsperiod am Dezember 2013 réckwierkend ze applizéieren. Dat ass eng politesch Entscheedung, dat ass elo keng juristesche bannend Entscheedung.

Mir sinn der Meenung, dass déi Ennerbriechung, déi ka kommen, wann een déi doten Zéngjoresregelung wëllt suspendéieren, muss mindestens d'Dauer vu fënnf Joer hunn, mindestens d'Dauer vun enger normaler Legislaturperiod hunn.

Als Kommissioun hale mer drop, an ech si frou, dass de Bureau vun der Chamber an och d'Conférence des Présidents dat net aneschtens gesinn, dass am Virfeld vun dësem nationale Referendum, a grad och, well och d'Chamber als Constituante hei mat implizéiert ass, d'Chamber an där doter Fro eng besonnesch wichteg Roll vun Informatioun ze spillen huet.

Iwwer Chamber TV, iwwer Internetsite awer och iwwer regional effentlech Diskussionsronne solle mer, mengen ech, den Enjeu vun dëser Verfassungsreform kloermaachen, solle mer awer besonnesch d'Bedeitung, de Pro a Kontra vun deenen eenzelne Referendumsfroe kloerstellen.

An och d'politesch Parteien - ech erënneren, déi sinn an der Verfassung verankert mam Optrag, fir zur Meenungsbildung, zur effentlecher Meenungsbildung bäizedroen - sinn hei als eenzel Partei gefuerdert, wéi et och wünschenswäert ass, an dat geschitt jo och zum Deel scho fir de Moment, fir dass d'Zivilgesellschaft sech an deen dote Referendum mat implizéiert.

Ech hoffen hei, dass déi bevirstehend Diskussioun mat deem néidege Respekt virun der Meenung vun deem anere gefouert ginn. Et geet och drëm, fir ze weisen, dass an enger repräsentativer Demokratie, wéi Lëtzebuerg eng ass a bleift, Elementer vun direkter Demokratie kee Friemkierper duerstellen, mä awer eng gewëss Beräicherung fir eist Zesummeliewen, eist Zesummeplange sollen duerstellen.

Et ass en Exercice vu méi Biergerbedeelegung, dee mer hei woen, a wou mer selwer mussen de Bewäis erbréngen, dass mer räif sinn; dass mer räif sinn, fir och kontrovers Theme sachlech a fair auszediskutéieren, an net eng Voleksbefragung zu engem Plebiszit géint oder fir eppes aneschtens ze maachen.

Et geet ëm eis Verfassung, et geet ëm Sachfreen, déi hei ze diskutéieren an ze léise sinn, an ëm näischt aneschtens. Et ass eng gemeinsam Verantwortung, déi mer ze droen hunn, dass mer an deem doten am Virus definéierte Kader déi dote Campagne an deenen nächste Méint a Wochen ugin.

An ech mengen, dass an engem Land, wat awer eng gewëss demokratesch Erfahrung huet iwwer laang, laang Jorzéngten, et och muss méiglech sinn, iwwer kontrovers Theme fair a sachlech ze diskutéieren. Et wär, a mengen Aen, ëm eis Demokratie hei am Land schlecht bestallt, wann een esou Diskussiounen net méi iwwerhaapt dierft hei zu Lëtzebuerg féieren. Duerfir solle mer, mengen ech, déi Diskussioun net fäerten, mä mir sollt se mat der néideger Seriositéit, awer och mam néidegen Enthusiasmus eigentlech ugoen.

Den 29. September 1919: Referendum iwwert d'Statsform an iwwer d'Wirtschaftsunioun. De 6. Juni 1937: Referendum iwwert dat sougenannt „Maulkuerfgesetz“. Den 10. Juli 2005: Referendum iwwert den Europäesche Verfassungstraité. A schlussendlech de 7. Juni 2015, wou et eréischt déi véierte Kéier ass, dass Lëtzebuerg sech uschéckt, iwwer en nationale Referendum politesch eng Fro effentlech ze diskutéieren.

Loosse mer alleguerten derzou bäidroen, aus deem dote Rendez-vous mam Wieler vläicht och e bëssen e Rendez-vous mat der Geschicht ze maachen. Dat wär, mengen ech, am Sënn vun eiser Demokratie, déi e bëssen zousätzleche Sauerstoff ka gebrauchen. A virun allem ass et awer och wichteg fir dee grousser Projet, dee mer elo zéng Joer hei gemeinsam droen, fir Lëtzebuerg endlech eng nei Verfassung ze ginn.

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Bodry. Éischten ageschriwwene Riedner ass den Här Claude Wiseler.

Discussion générale

► **M. Claude Wiseler (CSV).** - Merci, Här President. E Vote iwwer e Gesetz, wat e Referendum organiséiert, ass schonns eppes Aussergewöhnlech. Aussergewöhnlech zu Lëtzebuerg, mä och aussergewöhnlech an Europa an an eisen Nopeschlänner, vläicht mat Exceptioun vun der Schwäiz. Wann een e weëneg duerch Europa kuckt, da gesäit een, datt national Referende relativ rar sinn. Dat ass net de Fall fir regional, dat ass net de Fall fir lokal Referenden.

Vun eisen Nopeschlänner ass Frankräich dat Land, wat am meeschten an deene leschte Jorzéngte Referendume gemaach huet. A wann ee kuckt, wat fir eng Referendume se gemaach hunn, da waren ëmmer Referendumen dann, wann an der franséischer Geschicht wichteg Momenter do waren a wann et drëm gaangen ass, Décisiounen, wegweisend Décisiounen fir d'Land ze huelen.

1958 d'Aféierung vun der Cinquième République, 1961 d'Autodétermination vun Algerien, 1962 Accords d'Évian. Och de Suffrage universel, wou de President gewielt gëtt, wat eng majeure Réforme vun der franséischer Constitutioun war. 1969 d'Regionalisatioun. 1972 den Élargissement vun der CEE. Duerno d'Autodétermination vun Neikaledonien, den Traité vu Maastricht, d'Reduktiounen vun de Presidentschaftsmandater, den Traité vun Europa. All Kéiers dann ass zu engem Referendum gegräff ginn, wann e wesentleche Punkt an der franséischer Geschicht op der Säit geschriwwen ginn ass, déi just opgeschloe war.

Mir hunn och gesinn, wann een d'Referendumen a Frankräich analyséiert, datt haapt-sächlech, net haapt-sächlech, mä ëmmer et ëm institutionell Froen gaang ass oder ëm Froen vun Transfert vu Souveränitéit gaang ass.

Wann een dann an eisen aneren Nopeschlänner kuckt: An der Belsch stelle mer fest, datt 1950 dee leschte Referendum gemaach ginn ass. Dee Moment, wou et ëm d'Zréckkéiere vun dem Kinnek Léopold III. gaang ass, ëm d'Froe vun der Monarchie sengerzäit. 2004 wollt oder sollt ee gemaach ginn, do ass dat an der Belsch net gaang, well gesot ginn ass, mä Dir hutt eng Démocratie représentative an de Referendum huet doranner keng Plaz!

An Däitschland si keng Referendume gemaach ginn an et sinn der just virgesinn, wann et ëm Froen vu Grenzenännerunge geet. A Spuenien ass just 1986 ee gemaach ginn, fir an der NATO ze bleiwen an 2005 fir de constitutionnellen Traité. An Holland, 2005, just fir de constitutionnellen Traité. A Portugal och 2005 fir de constitutionnellen Traité an 2007 iwwert d'Fro vun der Interruption volontaire de grossesse: Jo oder Neen dozou.

Zu Lëtzebuerg, den Här Bodry huet dat gesot, bis elo dräimol. Dräimol, och all Kéiers a wesentleche Froen vun eiser Geschicht. 1919 iwwert d'Fro, wou mer eis géifen uschlëssen, Belsch oder Frankräich, respektiv ëm d'Fro vun der Fortféierung vun eise Regime iwwerhaapt, wéi et soll weidergoen zu Lëtzebuerg mat all deenen Demandé vun deene Länner, déi ronderëm eis waren, fir eist Land ze annexéieren. Fir eis Independenz ze markéieren ass e Referendum gemaach ginn.

1937, an enger Zäit, déi mer alleguer kennen, de Premierminister huet virdrun de Rapport Artuso déposéiert, hei sinn d'Virleefer scho mat Froen vu Fräiheet, wou et ëm d'Maulkuerfgesetz gaang ass, wou driwwer ofgestëmmt ginn ass sengerzäit, wou dem Resultat och Rechnung gedroe ginn ass, inklusiv mat all senge Konsequenzen d'ailleurs! 2005 den Traité constitutionnel hei zu Lëtzebuerg.

Wesentlech Momenter vun der Lëtzebuurger Geschicht, wou Froen vu Regime, vun eise Fräiheeten, vun Abandon vun der Souveränitéit nationale am Raum stoungen. An domat schreiw mer eis am Fong, mat deene Referendumen hu mer eis an d'Traditioun vun den europäesche Referendumen a wesentleche Froen ageschriwwen.

Haut ass eng Diskussioun, déi ass virdru vu mengem Virriedner genannt ginn, iwwert déi partizipativ Demokratie. An iwwert déi ass och eng Diskussioun ze féieren. Just, datt mir als CSV soen, mir befannen eis awer momentan an engem Regime vu repräsentativer Demokratie. A mir mengen, datt d'Politik an hirer Komplexitéit, esou wéi se haut ass, an och an Zukunft net wäert anescht ginn, net kann, net soll mat Äntwerten op ganz eenzel Froen sech léisen. Mä d'Froe mussen, an hirer Komplexitéit, an hiren Zesammenhäng, geléist ginn an am Kader, zu engem ganz groussen Deel fir eis, vun der repräsentativer Demokratie.

Datt domat muss méi d'Implicatioun vun de Leit gesicht ginn, méi Participatioun an eiser Demokratie gesicht ginn, ass natierlech enorm wichteg. Och fir eis. A villes ass an deene leschte Jore gemaach ginn. D'Petitionsrecht.

De fräien Zougang zur Informatioun: ass nach amgaang, gemaach ze ginn. Biergerforumen, Zukunftsdëscher mat der Zivilgesellschaft, Initiatives populaires, Referendumen, inklusiv op lokalem Niveau an och op nationalem Niveau. Mä nach muss ee wëssen, ëm wat een esou Referendumen dréie léisst.

Et ass vun der Regierung versprach ginn, méi partizipativ Demokratie. An dann ass awer direkt am Regierungsprogramm dekrétéiert ginn, wat fir eng véier Froen, dräi sinn et der nach haut, dann elo géifen an engem Referendum kommen. Dovun ass vun deenen dräi, déi gestallt gi sinn, sécherlech, an eisen Aen, eng, déi vun dem Ausländerwahlrecht, wat eng Fro ass, déi vun der Importenz, vun der Wichtigkeet hier sécherlech kann e referendare Charakter hunn. Dat ass an eisen Ae fir déi aner Froen wesentlech manner de Fall.

Ech stelle just fest, datt, mat deem Schrëtt, deen d'Majoritéit mécht, mer ewech vun enger Rei Prinzipien awer kommen! Éischte Prinzip, dat ass, datt mer a groussen historesche Momenter vun eiser Geschicht - do, wou et drëm geet, Weeër frësch opzeweisen, an dann de Referendum als Instrument benotzen -, datt mer vun deem Prinzip ewechkommen.

Zweete Prinzip, vun deem mer ewechkommen, dat ass, datt mer constitutionnel Annerungen an engem grousser gesellschaftleche Konsens wëlle maachen, mat grousser gesellschaftlechen a parlamentaresche Majoritéiten. Déi hu mer an deene Froen net!

An et gëtt e Referendum gemaach, an deem gesot gëtt, mir wëlle méi partizipativ Demokratie, fir am Fong dee grousser Konsens an der Gesellschaft, an der Chamber op enger Rei Froen ze ëmgoen an iwwer e Referendum ze ëmschiffen. Wat fir eis e wesentleche Punkt ass an der Argumentatioun vun dësem Referendum.

D'Participatioun an déi Biergerbedeelegung, déi ganz oft ervirgetrach gëtt, kënn eis ganz oft wéi e Virwand vir! Et steet am Exposé des motifs vum Text, an ech zitieren: «Les auteurs de la proposition de loi entendent associer les citoyens à l'élaboration d'une nouvelle Constitution, dont le projet est en voie d'élaboration depuis maintenant dix ans.» An den Här Bodry huet et och nach eng Kéier, genau esou, justifiéiert.

Ech soen, dat ass awer nëmme hallef wouer. Dat ass awer nëmme e Prétexte. Well wann Der e weëneg weiterliest am Rapport an Dir liest, firwat déi Froen hei erausgewielt gi sinn, da steet dodran: «Il s'agit de questions institutionnelles sur lesquelles il n'existait pas de majorité large au Parlement pour le maintien du statu quo respectivement pour une modification des règles en vigueur.»

(Interruption)

Richteg. Dofir soen ech, dat éischt Argument, dat ass keen Argument, wat richtig ass. Dat zweet Argument ass dat, wat richtig ass. Et war keng grouss, large konsensuell Majoritéit weder an der Gesellschaft nach an der Bevëlkerung, fir déi Froen ze beäntwerten. Dir gitt iwwer e Referendum, fir am Fong d'Meenung vun der CSV, grousser Partei, d'Meenung vun der CSV, ouni déi Der déi constitutionnel Majoritéit hei net an der Chamber hutt, fir déi en fin de compte ze ëmschiffen.

De Claude Adam huet et ganz gutt an engem Artikel, an engem Interview resüméiert am „Journal“ vum Februar 2015: „Es handelt sich um Fragen, bei denen wir uns im Rahmen der Verfassungsreformen nicht einigen konnten. Wäre es zu einer Einigung gekommen, ähnlich wie in der Debatte um die Priestergehälter, hätten sich auch diese Fragen erübrigt.“ Zitat. Ech weess net, ob d'Zitat richtig ass oder net, mä esou steet et emol do.

Et geet net drëm, d'Leit ze froen iwwer hir Meenung an iwwert déi Froen, déi d'Leit kéinten interesséieren. Et geet hei drëm, déi eng oder déi aner Partei an der referendarescher Diskussioun ze ëmgoen, mat engem Referendum! Wäre een interesséiert gewiescht an där Referendumsdiskussioun an deem, wat d'Leit wierklech denken, an un deene Froen, déi se wierklech interesséieren, dann hätt ee jo och eng ganz Rei aner Froen kënnen stelle wéi just déi, déi erausgewielt gi sinn, well eng vun de Parteien, oder méi wéi eng vun de Parteien net domadder d'accord waren.

Et hätt ee kënnen d'Fro stellen zum Beispill vun de Bezierker. Gëtt et véier Bezierker, gëtt et an Zukunft nëmme ee Bezierk? Et hätt ee kënnen d'Fro stellen iwwert d'Zuel vun den Deputéierten, iwwert d'Aufgabe vun de Gemengen, iwwer eise Wahlsystem, iwwert d'Aufgabe vum Conseil d'État, iwwert d'Roll vun de Parteien, iwwert d'Recht vun den Elteren, fir hir Kanner fräi ze erzeien, fräi ze bestëmmen, wéi déi Erzéiung soll geschéien,...

► **Une voix.** - Très bien!

► **M. Claude Wiseler (CSV).** - ...iwwert de Fonctionnement vun der Justiz oder aner constitutionnel Froen.



A firwat am Fong just constitutionnel Froen? Och bei wichtege Décisionen, net constitutioneller, an 1937, wëll ech just soen, ass eng Fro gestallt ginn am Referendum, déi net constitutioneller Natur war. D'Maulkuerfgesetz, wéi een et nennt, war net e constitutionnelt Gesetz. D'Fro ass awer gestallt ginn.

Et hätt ee kënne d'Fro stelle bei der Allocation d'éducation. Wann een interesséiert gewiescht wär, wat d'Leit soen, dann hätt een och kënne déi Fro stellen.

(Interruption)

Firwat net? Ech wëll lech just éierlech soen, Dir sot, et sinn an der Schwäiz e puer...

Ech hunn net gesot, Dir sollt déi Fro stellen. Mir hu se d'ailleurs och net proposéiert!

► **Une voix.**- Dir hätt Froe kënne proposéieren.

► **M. Claude Wiseler (CSV).**- Mir hu se d'ailleurs och net proposéiert!

(Brouhaha)

An dat wollt ech genau soen, well ech jo wousst, dofir hunn ech...

(Brouhaha)

Dofir hunn ech dat do jo elo provoziert, well ech jo wousst, datt Der géift mat där doter Antwort kommen!

Mir hunn natierlech keng proposéiert, well mer der Meenung waren, datt mer dee Referendum, mat deene Froen, déi hei virgesi waren, net kéinten ënnerstëtzen, net kéinten domadder d'accord sinn an en net wëilten duerch zousätzlech Froen, déi mer als richtig géifen empfangen, legitiméieren. Dofir hu mer keng Froe proposéiert, well mer mam Prinzip mat dese Froen net konnten, net wëllen d'accord sinn. An dat hu mer vun Ufank un an aller Kloecheet gesot!

Wann ech elo op déi individuell Froen aginn - ech wëll dat haut net am Detail maachen, mir hunn nach véier Méint, fir dat kënne ze maachen, mä trotzdem -, d'Formulatioun vum deene Froe si fir eis extrem vag an net prezis. Hei gi Froe gestallt iwwert d'Iddi: Sidd Dir d'accord mat der Iddi, datt soll eppes gemaach ginn? Dat ass awer nu wierklech alles anescht wéi eng prezis Fro, wou dann eng prezis Antwort drop soll kommen!

De Conseil d'État gesäit et genau d'selwecht an e seet, ech zitieren de Conseil d'État, à son avis: «La formule retenue peut toutefois mener à des ambivalences dans la mesure où l'on peut approuver l'idée elle-même, tout en répondant par la négative à la question posée pour des raisons liées aux circonstances concrètes de celle-ci et aux modalités de leur mise en œuvre.» Par conséquent il se demande, de Conseil d'État, «dès lors si les questions n'auraient pas avantage à être reformulées plus clairement en abandonnant notamment la référence à l'„idée” qui sous-tend les questions envisagées.» Eng kloer Meenung, déi hei vum Conseil d'État ausgedréckt ass. Dat ass awer net geschitt!

Wann een elo op déi eenzel Froen zréckkënn, da muss ech och do soen, et sinn eng Rei Saachen, déi an dem Commentaire gesot ginn, déi awer net an der Fro gesot ginn. Ech huelen déi eenzel Froen duerch.

Bei där Fro iwwert d'Ministeschmandater vun zweemol fënnf Joer, den Här Bodry huet et ënnerstrach, et steet och am Commentaire, gëtt gesot: „Mir maachen eng Paus vu fënnf Joer an da kënne erëm eng Kéier déi zéng Joer do lassgoen.“ Déi Paus vu fënnf Joer, déi steet awer net an der Fro. Déi steet am Kommentar. Mussen d'Leit dann elo Chamber TV oder de Kommentar, Chamber TV kucken oder de Kommentar liesen, fir ze wëssen, wéi déi Fro genau formuliert ass? Mir fannen et onprezis an am Fong net passend fir esou e Referendum.

Déi zweet Fro, dat ass déi vun de 16 Joer. Do steet dran op eng explizit Aart a Weis, also op eng Aart a Weis, datt et sech hei nëmmen ëm d'Wieler handelt. De Kommentar dovunner ass awer net evident. «Elle tient à souligner», seet d'Kommissioun, «que dans le cadre de la campagne référendaire, les partis politiques pourront expliquer la portée juridique exacte de la première question.» Dat heescht, du muss, fir déi Fro genau ze verstoen, op d'Versammlung vum de politesche Parteie goen, fir déi richtig Explikatiounen dofir ze kréien, soss kriss de net genau de Contenu vun där Fro mat! Dat fanne mer och net normal an esou enger preziser Saach wéi de Referendum awer soll sinn.

Beim Auslännerwahlrecht ass en ähnleche Problem dran, an deen ënnersträicht och de Conseil d'État. De Conseil d'État freet: «avoir résidé pendant au moins dix ans» am Land, ob dat géif heeschen, eng Résidence continue oder net eng Résidence continue. Am Rapport ass d'Explikatioun: «La commission estime que le résident ne doit pas avoir résidé au Luxem-

bourg de manière ininterrompue pendant les dix ans précédant l'inscription sur les listes électorales pour les élections législatives. La question est à trancher et à comprendre dans ce sens.»

Du muss also de Commentaire des articles liesen, fir kënne déi genau Interpretatioun vun der Fro ze maachen. Or, wann s de an der Kabinn stees, hues de awer de Commentaire des articles net derbäi, fir ze liesen, wat et heescht! Och déi Fro fanne mer relativ large ausgedréckt an net passend fir déi Präzisioun, déi awer esou wichtig Froe missten hunn.

Ech wëll dann och e puer politesch Remarquen, ewech vun deenen technesch, e puer politescher awer maachen iwwert déi eenzel Froen. Déi Fro vun de 16 Joer, Wahlrecht mat 16 Joer, gëtt justifiéiert mat Argumenter, datt haaptsächlech den Interessi vun deene jonke Leit un der Politik domadder géif suscitéiert ginn.

Ech fannen dat Argument jo e besonnescht. Wéi wann d'Wahlrecht, eenzeg an eleng d'Wahlrecht, wat een engem gëtt, géif garantéieren, datt elo den Interessi un der Politik suscitéiert ass! Déi Politikverdrossenheet, déi hei am Land ass, ass jo net just eng Politikverdrossenheet vu Leit ënner 18 Joer, net just vu Jugendlechen. Et ass eng Politikverdrossenheet vu ganz ville Leit, déi d'Wahlrecht hunn a wou d'Wahlrecht awer net iwwert d'Politikverdrossenheet ewechhëlleft.

Dofir, des Problematik just wëllen ze léise mat dem Fait, datt een elo de Jugendlechen d'Wahlrecht gëtt, mengen ech, ass wierklech net déi richtig Antwort. Déi Problematik verlaangt eng ganz aner Diskussioun, verlaangt eng ganz aner global Antwort.

Froen iwwert d'Schoul stelle sech hei, Froen iwwert d'Attributioun vum Jugendparlament, iwwert d'Kollaboratiounen an de Gemengen. A wann ech déi moer Explikatioun vum deene sechs Sätz, déi am Commentaire des articles steet, liesen, da steet just ee kleng Saz doruwwer: «Il est évident que cette possibilité de participation politique accordée aux jeunes doit être accompagnée d'efforts supplémentaires dans le domaine de l'instruction civique, notamment à l'école.» Dat ass alles, wat doruwwer dosteet.

Ech soen lech, wann een op déi do Fro, wat awer eng wichteg Fro ass, just déi Antwort gëtt, da verfeelt een awer de Sujet! Da verfeelt een awer de Sujet mat där Fro. Ouni globaal Konzept, ouni seriö Explikatioun eng Fro einfach esou ze stellen, fanne mer net richtig, fanne mer net derwäert.

An da soen ech och nach, déi Antwort, déi hei suggeréiert gëtt: firwat da 16 Joer? Firwat 16 Joer? Firwat net 17, esou wéi den Här Kollwelter an den Här Zanussi et sengerzäit virgeschloen hate fir legislativ Wahlen 1996? Oder firwat net 16 beim kommunale Wahlrecht, wéi si et och virgeschloen haten, mä dann aktiiv a passivt Wahlrecht? Dat war eng Propositioun aus Äre Reien 1996. Firwat dat aktiiv an net dat passivt? Firwat fräiwëlleg an net obligatoresch? Wéi sinn all déi Implikatiounen, déi sech domadder stellen op d'Zivilrecht, op d'Penalrecht?

Keng Äntwerten, keng Diskussioun, déi gefouert ginn ass, keng Justifikatiounen! Just ee Saz, just eng Propositioun, déi eis awer de Problem, dee sech richtegerweis stellt an deen och richtig erkannt ginn ass, déi awer de Problem, ob se esou oder anescht beäntwert gëtt, net wäert léisen.

Déi duebel Mandater vun de Ministeren, zweemol fënnf Joer maximum.

► **M. Gast Gibéryen (ADR).**- Dat misste mer onbedéngt maachen!

(Hilarité et brouhaha)

Da géife mer de Sozialisten e Gefale maachen. Da géife se e puer Stéck lassginn, déi se gäre lass wieren.

► **M. Claude Wiseler (CSV).**- Mä, Här Gibéryen, ech stelle mir just d'Fro: Wou kënnt déi Fro do hier?

► **M. Gast Gibéryen (ADR).**- Ma vun de Sozialisten.

► **M. Claude Wiseler (CSV).**- Zweemol fënnf...

► **M. Gast Gibéryen (ADR).**- Vun de Sozialisten! Et sinn e puer Leit, déi se da géife lassginn.

(Hilarité, brouhaha et coups de cloche de la présidence)

► **M. Claude Wiseler (CSV).**- Wou ass se scho gestallt ginn? A firwat ass se wichteg? Déi Solutioun, déi hei proposéiert gëtt, ass a sech och néierens justifiéiert. Sot mir emol, zweemol fënnf Joer: firwat zweemol fënnf Joer? Firwat net eemol fënnf? Firwat net dräimol fënnf? Wou kënnt een un déi zweemol fënnf? Firwat eng Paus vu fënnf Joer? Firwat net eng Paus vun zéng Joer? Firwat net eng Paus vun engem Joer? Firwat iwwerhaapt nach duerno kënne weiderfueren? Wéi explizéiert Der dat? Wat fir

eng Logik, wat fir ee Sënn - wann een d'accord wär mat dem Fait -, mä wat fir ee Sënn mécht déi hei Propositioun? Firwat just déi do Zuelen?

Da gëtt gesot, d'Argument, fir dat hei ze froen, dat ass: Mir brauche méi Erneuerung. Ech kommen dorop zréck. An den Här Bausch, deen huet awer och en anert Argument - well en elo hei ass, muss ech dat awer soen -, en anert Argument, ech mengen, et war an eng RTL-Emissioun, gebraucht, wou hie seet: „No siwen, aacht Joer ass ee midd an ausgelaugt an där Fonctioun.“ Här Bausch...

(Brouhaha)

Jiddweree muss fir sech schwätzen.

► **Une voix.**- Hien huet keng Ausdauer!

► **M. Claude Wiseler (CSV).**- Jiddweree muss do...

(Interruption)

Jiddweree muss do fir sech schwätzen. Aner Leit sinn net midd an ausgelaugt. Mä Verschidener sinn dat schonn no zwee, dräi Joer, midd an ausgelaugt.

► **M. François Bausch, Ministre du Développement durable et des Infrastructures.**- Dat hängk dovunner of, wéi ee sech asetzt a sengem Ministère!

► **M. Claude Wiseler (CSV).**- Ganz genau!

► **Une voix.**- Hien ass e Sprinter. Hien ass e Sprinter, Här Wiseler.

(Brouhaha général)

► **M. Claude Wiseler (CSV).**- Also kuckt emol, wéi vill Ministeren an Ärer Regierung scho méi laang do waren!

(Brouhaha)

► **M. Mars Di Bartolomeo, Président.**- Just den Här Wiseler...

► **M. Claude Wiseler (CSV).**- A jugéiert Är Wierder un deem, wat do gesot ginn ass!

► **M. Mars Di Bartolomeo, Président.**- Just den Här Wiseler huet d'Wuert.

► **M. Gast Gibéryen (ADR).**- Den Här Bausch ass nach guer net midd.

► **M. Claude Wiseler (CSV).**- Dat anert Argument, dat ass dat vun der Erneuerung, wat och den Här Bodry hei gebraucht huet: „Mir brauchen Erneuerung am Personal.“ Mä ech soen lech awer och ganz éierlech, wann ee gären Erneuerung hätt, a wann eng Partei gären Erneuerung hätt bei hirem Personal, da sot mer: Firwat decidéiert d'Partei dat dann net selwer? Firwat brauche mer dann dofir e Gesetzestext, fir dat ze maachen?

(Interruptions)

Firwat, wann Der eng Rei Ministeren net méi wëllt an eng Regierung, decidéiert Der net, se erauszehuelen? Dat kënnt Der jo maachen!

(Brouhaha général)

Dat kënnt Der jo maachen. An et sinn der zwee, déi iwwer zéng Joer schonn hei sinn.

(Brouhaha général)

Dann huet se...

(Coups de cloche de la présidence)

Dann huet se einfach eraus!

(Brouhaha et coups de cloche de la présidence)

► **M. Mars Di Bartolomeo, Président.**- Wann ech gelift! Wann ech gelift, bis elo hate mer e ganz gudden Niveau an der Diskussioun. Kommt, mer fueren esou virun!

(Coups de cloche de la présidence)

► **M. Claude Wiseler (CSV).**- Mä ech wëll awer meng Fro beäntwert kréien.

Firwat imposéiert Der - an dat ass awer elo seriö -, firwat imposéiert Der de Leit iwwer Gesetz eng Solutioun, déi, wann Der se wëllt, jiddwer Partei fir sech kann decidéieren? Firwat? Firwat? Firwat huet Der de Leit déi Fräiheet ewech, déi Leit ze wielen, déi se wëllen, an der Perspektiv, datt se an d'Regierung kommen, well se se gären d'Regierung hätten? Firwat huet Der déi Fräiheet ewech? Just well Dir sot...

(Interruptions)

► **M. Alex Bodry (LSAP).**- ...déi Iddi do...

► **M. Claude Wiseler (CSV).**- Just well Dir sot: Mir hätte gären Erneuerung.

► **M. Alex Bodry (LSAP).**- ...awer net vun de Leit.

► **M. Claude Wiseler (CSV).**- Just well Dir sot: Mir hätte gären Erneuerung.

Da stelle mer och nach d'Fro hannendrun, da sot mer emol: Firwat maacht Der dat do just bei de Ministeren? Firwat maacht Der et net bei den Deputéierten?

(Interruptions)

Firwat maacht Der et net bei de Buergermeeschteren a bei Schäffen?

(Interruptions)

Firwat?

(Interruptions)

► **M. Alex Bodry (LSAP).**- ...nach 100 Joer!

► **M. Claude Wiseler (CSV).**- Mä ech hätt awer emol gären eng Explikatioun. Mir wëllen, Här Bodry, weder dat eent nach dat anert!

► **M. Alex Bodry (LSAP).**- Ma da maacht Dir et!

► **M. Claude Wiseler (CSV).**- A mir wëlle weder dat eent nach dat anert!

► **M. Georges Engel (LSAP).**- Dat, wat mer lech proposéieren...

► **M. Claude Wiseler (CSV).**- Här Engel, mir wëlle weder dat eent nach dat anert! Mir froen lech just, firwat Dir dat eent maacht an net dat anert a wat den Ennerscheed ass tëschent deem engen an deem aneren. Firwat een am Exécutif national ka sinn a firwat een an engem Exécutif an der Gemeng ka méi laang sinn. Firwat? Wat ass d'Argument derfir?

► **M. Etienne Schneider, Vice-Premier Ministre.**- ...bei deem engen decidéiert...

► **M. Claude Wiseler (CSV).**- Dat ass net... Sot mer et nach eng Kéier, ech hunn et net verstanen!

► **M. Etienne Schneider, Vice-Premier Ministre.**- Bei der Chamber decidéiert de Wieler, ob en lech nach hei wëllt sëtze gesinn oder net. Bei der Regierung decidéieren d'Parteien.

► **M. Claude Wiseler (CSV).**- Majo, da kënne d'Parteien dat jo duerchaus decidéieren. Firwat wëllt Der et dann an d'Gesetz aschreiwen?

(Interruptions)

Dat ass jo genau d'Fro.

(Interruptions)

Dat ass jo genau d'Fro: Firwat wëllt Der et dann an d'Gesetz aschreiwen, Här Schneider?

(Brouhaha)

► **Une voix.**- ...dofir ass et an der Fro. An den Här Berger huet vläicht Angscht, erauszefléien.

(Brouhaha, hilarité et coups de cloche de la présidence)

► **M. Claude Wiseler (CSV).**- Firwat wëllt Der de Leit...

► **M. Mars Di Bartolomeo, Président.**- Här Wiseler, Dir hutt d'Wuert.

(Interruptions diverses)

Wann ech gelift, lauschtert dem Riedner no!

► **Une voix.**- Si sinn nervös.

(Coups de cloche de la présidence.)

► **M. Claude Wiseler (CSV).**- Firwat wëllt Der de Leit e Recht ewechhuelen? Firwat wëllt Der déi Fräiheet ewechhuelen? Firwat wëllt Der och en Atout ewechhuelen, dee mer an eisen Aen duerch de Fait hunn, datt eng Rei Leit eng grouss Experienz hunn, notamment um europäesche Gebitt, an domat e grouse Respekt hunn an europäesche Kreesser, deen een duerchaus kann ausspillen?

Ech soen elo, den Här Asselborn huet, duerch vill Respekt, deen en huet, déi zwee Joer, déi en elo am Conseil de Sécurité war, dat gutt kënne maachen. Hätt en dat net gehat, hätt hie sech vläicht a verschiddenen Dossiere net esou durchsetze kënne, wéi e sech elo konnt durchsetzen. Ech wëll dat just soen.

No Ärer Rechnung hätt e scho laang missen dobause sinn, hätt e scho guer net méi an der Regierung dierfe sinn! Firwat priviere mer eis vun deem Avantage? Firwat?

(Interruption)

E Minister, dee Premierminister wëllt ginn...

(Interruption)

Här Bettel, Dir sidd elo net am Fall. Mä an engem klassesche Fall, fënnf Joer an der Regierung, kann e fënnf Joer Premier sinn, muss e goen.

► **M. Xavier Bettel, Premier Ministre, Ministre d'État.**- Duerfir maacht Dir elo Är Paus.

(Interruptions)

► **M. Claude Wiseler (CSV).**- Fënnf Joer Minister kann e sinn, fënnf Joer Premier, da muss e goen. Ech fannen dat net normal. Ech fannen et schiedlech fir d'Land, well mer eis een Atout ewechhuelen, wann dat hei géif duerchkommen. An ech hoffen, datt mer déi Diskussioun och dobause kënne seriö féieren, well ech weess, wéi op esou Froe relativ intuitiv vun de Leit geäntwert gëtt. A mir mussen mat den Argumenter virgoen,...



► **Une voix.**- Also schiedlech fir d'Land... Dat ass awer...

► **M. Claude Wiseler** (CSV).- ...fir déi Äntwerte respektiv fir déi Argumenter och eriwwerzebréngen.

Mir fannen déi do Fro onnéideg. Si ass och ouni Débat virdu gewiescht. Et ass just eng Fro, fir eng Fro ze stellen. A mer fannen, datt hei e populisteschen Débat déclenchéiert gëtt.

► **M. Gast Gibéryen** (ADR).- Voilà!

(Interruptions)

► **M. Claude Wiseler** (CSV).- Wat d'Ausländerwahlrecht ugeet, ass et sécherlech,...

► **Une voix.**- Ooh!

► **M. Claude Wiseler** (CSV).- ...an ech hunn et virdu gesot, sécherlech eng referendaresch Fro. De Corps électoral gëtt geännert, an dat ass wichtig.

D'Fro, ob een awer déi do Fro an dësem Moment soll stellen, ob d'Opportunitéit vun dëser Fro, mat all deem, wat u schwierigen Diskussiounen op eis zoukënnt, elo ass, hu mer oft genuch gesot. Ech wëll dat net nach eng Kéier widerhuelen.

Richteg ass awer, datt 45% vun Netlëtzebuerger hei am Land e Besoin vun zousätzlecher Participatioun noutwendeg maachen. An déi Zilsetzung, soen ech ganz kloer, deele mir och als Partei. Dofir hu mer proposéiert, eng Solutioun fir déi hei Fro iwwert d'Nationalitéitgesetz ze fannen.

Mir deet et nach ëmmer leed, datt mer dofir net konnte gemeinsam eng gréisser Diskussioun mateneen organiséieren. Well et wär besser gewiescht, déi Diskussioun ze féieren op eng calme Aart a Weis, wéi elo se an e Referendum ze ginn, wou se duerchaus emol kann ausrutschen, wat dësem Land géif richteg schueden. An Dir hutt et selwer ënnerstrach.

Wann een dat awer elo mécht, da muss ech mech just froen, Dir schlot hei eng Solutioun vir, wou Der sot, et muss een zéng Joer am Land sinn an et muss een eng Kéier scho mat wile gaange sinn. Da stellen ech mer d'Fro: Firwat déi do Konditiounen? Wou kommt Der un déi do Konditiounen? Wat bezwecken déi Konditiounen? Wat brénge se?

Mir sinn nämlech der Meenung, datt, wann Der wierklech d'Participatioun vun den Netlëtzebuerger wëllt an Dir stellt esou restriktiv Konditiounen wéi déi do, da kritt Der net déi Äntwert - wann dat hei géif duerchgoen -, net déi Äntwert op déi Fro, déi Der gären hätt. Dir kritt net déi Participatioun an déi Zuele vu Participatioun, déi Der braucht.

Déi Proposition, déi mir gemaach hunn iwwert d'Nationalitéitgesetz, wäert eis wesentlech méi Effikasitéit bréngen, wesentlech méi Leit, déi d'Lëtzebuerger Nationalitéit kréien an déi duerno kënne mat wile goen, aktiv a passiv mat wile goen, wéi déi Proposition, déi Dir macht.

Ech mengen, datt d'Participatioun wesentlech méi duerch deem Text wäert ënnerstëtzt ginn, wéi duerch déi Proposition, déi Der do macht. An ech froe mech och: Firwat just déi hei Proposition? Et wären 100 aner Solutiounen méiglech gewiescht. A se ass och néierens justifiéiert, weder déi zéng Joer nach de Fait, datt een eng Kéier soll derbäi gewiescht sinn. Néierens justifiéiert!

Ech froe mech d'ailleurs, firwat net déi do Frostellung anescht ugaange ginn ass. Firwat kann een hei just mat jo an Neen äntwerten? Firwat huet een net d'Fro gestallt vun der Participatioun, ob een déi wëllt iwwert d'Nationalitéitgesetz, iwwer zéng Joer an eng Kéier schonn derbäi oder iwwer fënnf Joer hei am Land? Et hätt ee jo och kënne esou e Referendum organiséieren.

Et wär d'ailleurs net fir d'Éischt gewiescht, datt e Referendum mat enger Rei Alternativen organiséiert gi wär. De Referendum vun 1919 iwwert d'Dynastie war genau e Referendum mat véier Alternativen: éischters, de Maintien vun der Grande-Duchesse Charlotte (veuillez lire: Marie-Adelheid), zweet Alternativ war de Maintien vun der Dynastie, mä mat enger anerer Grande-Duchesse. Déi drëtt Äntwert, dat war d'Opsetze vun enger anerer Dynastie. An déi véiert Äntwert war d'Republik. Et konnt ee bei véier Alternativen tëschent där enger an där anerer wilen.

Hätt ee wëlle wierklech d'Fro stellen, wéi d'Leit d'Participatioun brauchen, hätt ee jo duerchaus kënne all d'Alternativen, déi eng an déi aner ugin an d'Leit richteg wile loosse tëschent verschidde Systemer, déi méiglech sinn, mat darselwechter Zilsetzung, déi mer jo deelen.

Mä firwat just déi hei? Firwat d'Reduktioun vum Choix? Eng Äntwert, déi an eisen Aen net vill, wann net näischt bréngt! A mir mengen, datt et just gewiescht ass aus Angscht, well en hätt kënne, dee Referendum, eventuell schifgoen. Hei ass eng Chance, datt e vläicht mat Jo ausheet.

Mä ech fannen et net uerdentlech, net korrekt, net seriö, wéi dat do gemaach gëtt. Et geet just drëm, den Nationalitéiteprinzip hei aus dem Text erauszehuelen. En éischte kleng Schrëtt ze maachen, deen näischt zur Participatioun bäidréit. A wann een de Prinzip eng Kéier dobaussen huet, da kann ee jo déi nächst Etappen an deenen nächste Jore maachen. An dat ass fir eis problematesch als Usaz.

13. Dépôt d'une proposition de loi par M. Claude Wiseler

Ech wëll och, fir ze ënnersträichen déi Wichtigkeet vun deem hei Sujet - a well mer eng Proposition gemaach hunn -, och hei ganz offiziell dem Parlamentspräsident eng Proposition de loi iwwerreechen. Här President, wann ech gelift.

► **M. Mars Di Bartolomeo**, *Président.*- Merci.

► **M. Claude Wiseler** (CSV).- Iwwert déi Proposition, déi mer gemaach hunn, iwwert déi Proposition, déi a sech d'Nationalitéitgesetz emännert, fir d'Residenzklausel vu siwen op fënnf Joer erofzeschrauwen, fir e groussen Deel Droit du sol anzeféieren, nom franséische System. Dat heescht auslännesch Leit, auslännesch Kanner, déi hei op d'Welt komm sinn, gi mat 18 Joer automatesch Lëtzebuerger, ouni iwwerhaupt eng Demande méi mussen ze maachen. Se sinn et einfach mat 18 Joer.

Iwwert de Fait, datt s de keng Condition de résidence méi braucht ze hunn, wann s de mat engem Lëtzebuerger bestuet gëss, iwwer eng Facilitatioun vun eiser Kontroll am Sproochesystem an iwwert d'Dispens vun iwwerhaupt enger Sproochekontroll, wann s de 20 Joer hei am Land bass.

Ech wëll awer och soen, well ech wëll korrekt sinn, datt deem Text, dee mer elo agereecht hunn, zu engem groussen Deel den Text vum Projet de loi 6561 vum François Biltgen ass, dee mer nach eng Kéier agereecht hunn, mat deenen Ännerungen awer dran, déi ech elo gesot hunn, wou mer e gutt Stéck nach méi wäit ginn, wéi den Text vum François Biltgen sengerzäit gaangen ass.

6781 - Proposition de loi portant modification de la loi modifiée du 23 octobre 2008 sur la nationalité luxembourgeoise et portant abrogation de la loi du 7 juin 1989 relative à la transposition des noms et prénoms des personnes qui acquièrent ou recouvrent la nationalité luxembourgeoise.

► **M. Alex Bodry** (LSAP).- Deen Der virun zwee Joer net wollt. Ech war bei de Verhandlungen derbäi.

► **M. Claude Wiseler** (CSV).- Ech soen lech ganz kloer, datt d'Evolution vun den Diskussiounen natierlech ass, an Dir gesitt och d'Evolution vun där doter Fro an deene leschten 20 Joer, datt Schrëtt fir Schrëtt gemaach ginn ass. Dir wäert eis jo elo net reprochéieren, Här Bodry, deen Text hei ze déposéieren.

► **M. Alex Bodry** (LSAP).- Neen, d'Welt dréit sech net ronderëm d'CSV.

(Interruptions)

► **M. Claude Wiseler** (CSV).- Ech ginn lech domadder 100%eg recht, Här Bodry, d'Welt dréit sech net ronderëm d'CSV, wéi och net ronderëm aner Parteien.

Ech wëll awer e leschte Passage...

► **Une voix.**- ...wat een am Parlament seet...

► **M. Claude Wiseler** (CSV).- Mä se si jo och richteg. Ech wëll vläicht just nach...

► **M. Alex Bodry** (LSAP).- Wat ass elo déi richteg Iwwerzeegung vun der CSV, ech weess et net.

► **M. Mars Di Bartolomeo**, *Président.*- Wann ech gelift! Här Wiseler, fuert Dir virun!

14. 6738 - Proposition de loi portant organisation d'un référendum national sur différentes questions en relation avec l'élaboration d'une nouvelle Constitution (suite)

Discussion générale (suite)

► **M. Claude Wiseler** (CSV).- Ech fuere ganz gär weider, Här President. Ech wëll nämlech nach eng lescht Fro hei opwerfen, e puer Wuert soen iwwert déi Fro, déi net méi am Referendum ass: d'Relatioun tëschent Kierch a Stat, wat fir eis och e wichtige Sujet ass. An

d'CSV war och der Meenung, datt een op dësem Sujet misst bougéieren. Dir kënnt eise Wahlprogramm liesen, Dir hutt en d'ailleurs gelies.

Et ass e Sujet, dee komplex ass. Mir hunn ëmmer gesot, en ass vill ze vill komplex, fir eng einfach Fro am Referendum doriwwer ze stellen. Et stelle sech d'Froen iwwert d'Gehälter. D'ailleurs hutt Der se an där Konventioun, déi Der gemaach hutt, och wesentlech méi vast ugeschwat wéi an der Referendumsfro, déi gestallt gi war. Froen ëm d'Gehälter, ëm de Reliounsunterrecht, ëm d'Kierchefabrécken, Froen awer och iwwert de Contrôle, deen de Stat iwwert d'Kierche soll oder net soll exercéieren. Eng komplex Fro an e wichtige Sujet!

Mä an där Fro, déi Der am Referendum gestallt hat, hutt Der awer just ee Sujet ugeschwat, an dat war dee vun de Ministres des cultes. Sot mir just, firwat Der, wann Der esou eng wichtig Fro wëllt ugoen, déi esou komplex ass wéi déi do, se just wëllt ugoen an engem Referendum an dann d'Fro iwwert déi sougenannte Paschtéieschgehälter frot, oder d'Gehälter vun de Ministres des cultes. Firwat just déi Fro? Firwat net déi aner Froen? Firwat net eng Fro stellen dee Moment scho vun Ufank un iwwert...

► **M. Alex Bodry** (LSAP).- Well et eng Fro ass, déi haut an der Verfassung geregelt ass.

► **M. Claude Wiseler** (CSV).- Jo, aner Froe mussen och an der Verfassung geregelt ginn.

► **M. Alex Bodry** (LSAP).- Do ass et awer net anescht...

► **M. Claude Wiseler** (CSV).- De Contrôle, deen de Stat huet iwwert déi eenzel Reliounsgemeinschaften, ass och eng Verfassungsfro. Mir hunn d'ailleurs en Artikel 22 dofir ëmgeännert, fir déi Fro do an de Grëff ze kréien oder anescht ze formuléieren. Firwat hutt Der déi Fro dann net gestallt sengerzäit? Datt mer se elo eraushuelen, well se zu engem Deel beäntwert ass, fannen ech normal. Mä firwat just d'Fro stellen iwwert d'Paschtéieschgehälter?

An ech soen lech, well dat nu wierklech d'Aart a Weis war, fir de Problem uzegoen, well ee wëllt de Referendum einfach op seng Säit entscheet kréien, ouni déi richteg Froen ze stellen! D'Fro iwwert d'Paschtéieschgehälter an d'Gehälter vun de Ministres des cultes ass dach net déi richteg Fro, déi Der hei an där ganzer...

D'Fro iwwert d'Responsabilitéit vum Stat par rapport zu de Reliounen: Wéi wäit ass de Stat responsabel, fir ze wëssen, wat do geschitt? Dat ass déi richteg Fro! Hätte mer déi gestallt, hätte mer eng ganz aner Diskussioun kritt. Eng ganz aner Diskussioun, eng richteg Diskussioun, eng wichtig Diskussioun kritt. Dat wollte mer awer net als Diskussioun. Do hätt ee kënne de Referendum net gewonnen, an dat wär jo net richteg gewiescht.

Mir hunn dat populistesch als Approche fonnt, well mer fonnt hunn, datt déi richteg Problemer net hei ugeschwat ginn an datt déi Froen nëmme gestallt gi sinn, an et ass lech och gelongen, fir Drock auszeüben. Déi Konventioun ass op Basis vun deem Drock ënnerschriwwen ginn, an d'Fro konnt du vum Dësch geholl ginn. Mä d'Intentionen nëmme, fir Drock auszeüben, fannen ech a sech net korrekt.

Ech kommen zur Konkusioun. Dës Referendumsfro si just, esou wéi se elo hei gestallt sinn a formuléiert ginn, aus parteipolitesche Grënn gestallt an enger Frostellung, déi an eisen Aen net objektiv ass. Déi virgeschloen Alternative loosse sech an eisen Aen net seriö justifiéieren. A mir fannen, datt et hei e Mëssbrauch vun Instrument vum Referendum ass fir parteipolitesche Zwecker an datt et laanscht d'Leit geet. Dat Instrument vum Referendum ass eis extrem wichtig, mä esou ugewannt fanne mer et net seriö an et ass kee Courage, fir déi Froen ze stellen, déi a sech d'Leit interesséieren.

Ech soen awer och hannendrun, elo kréie mer eng Diskussioun, elo kréie mer eng Campagne an deenen nächste véier Méint. Ech ginn dovunner aus, datt dat Gesetz haut gestëmmt gëtt, egal wat ech soen, datt dat Gesetz haut gestëmmt gëtt, an da kréie mer déi Campagne. An ech soen och ganz kloer fir meng Partei, datt mer déi och probéieren, mat Argumenter ze maachen. Hei si mer jo an der Chamber.

Dobauss gi mer bei d'Leit an eis Versammlungen a mir wëllen och op déi Froen äntwerten. Mir wëllen och mat eisen Argumenter erklären, firwat mer esou an net anescht äntwerten, an dat seriö ugoen. Dat soen ech och kloer an d'äitlech hei. Ech soen och, dat ass jo just e konsultative Referendum.

Ech soen awer och hannendrun, datt natierlech d'Resultater vun deem Referendum, wéi se och ëmmer sinn, an eisen zukünftigen Iwwerleeungen nom Referendum, datt mer an eisen Iwwerleeungen deene Resultater wäerte Rechnung droen. Mä et muss een natierlech kucken, wat

sech do ausdréckt, wéi et sech ausdréckt, wéi d'Diskussioun an der Campagne leeft, an haapt-sächlech och, wéi d'Proportiounen vun de Resultater sinn. Op jidde Fall gëtt dëse Referendum e wichtegt Element an eisen zukünftigen Iwwerleeungen nom Referendum.

An ech soen nach hannendrun, datt och dës Majoritéit eng grouss Responsabilitéit hëlt, wa se dat do mécht. Haapt-sächlech duerno, wann deen nächste Referendum nom Artikel 114 vun der Constitution kënnt.

Mir waren ëmmer der Meenung, datt ee Constitutionsännerung sollt mat engem grouss gesellschaftleche Konsens maachen. Kommen elo hei Resultater, étriquiert Resultater eraus, déi Der duerno wëllt an d'Constitution mat iwwerhuelen, d'Constitution, déi Der dann erëm wëllt an e Referendum stellen, an där kommen zwee oder dräi mat all deenen Onzeffriddenheiten, déi schonn duerch aner Diskussiounen, zum Beispill déi Reliounsdiskussioun zesumme kommen, da stellt Der déi zéng Joer Aarbecht, déi awer gemaach gi sinn, an déi Nécessitéit an déi Wichtigkeet, déi eng nei Constitution vu Lëtzebuerg hätt, awer uerg a Gefor! Eng grouss Responsabilitéit, déi Der domat hutt. Ech wëll et just eng Kéier an aller Däitlechkeet hei gesot hunn.

An ass all deene Grënn wäert d'CSV zu dësem Text net kënne mat Jo äntwerten, mä mat Neen äntwerten.

Domat wär ech normalerweis fäerdeg. Ech wëll just nach eppes hannendruetzen, eng technesch Fro, den Här Bodry huet se och schonn ugeschwat, well se gëschter opkomm ass an där Diskussioun, wéi dann elo ausgezielt gëtt an deem Referendum hei. An dem Här Bodry seng Explikatiounen sinn och richteg.

Et ass just ee Punkt, also et ass elo e wéineg méi spontan hei, et ass just ee Punkt, deen ech net richteg verstinn, an dat ass deen, et ass jo méiglech, vu datt dräi Froen op engem Bulletin sinn, datt verschidde Leit op eng Fro äntworten an op zwou Froen net. Dat ass méiglech. An da gëtt dee Bulletin fir déi eng Fro valabel erkläert, deeselwechte Bulletin fir déi aner Froen awer net valabel erkläert. Dat fannen ech awer juristesche e richtige Problem.

Dann hätt een et a priori besser mat dräi separate Bulletine gemaach. Sou wéi et elo gemaach gëtt, ass och a kengem Gesetz fixéiert en fin de compte, datt mer de Bulletin eng Kéier als valabel an eng Kéier als net valabel erklären. Ech hu mech awer gefrot, ob dat net wierklech e reelle juristesche Problem ass, wa mer do zu de Resultater kommen.

Dat gesot, soen ech lech Merci fir d'No-lauschteren.

► **Plusieurs voix.**- Très bien!

► **M. Mars Di Bartolomeo**, *Président.*- Merci och dem Här Wiseler. Nächsten ageschriwwene Riedner ass den Här Eugène Berger.

► **M. Eugène Berger** (DP).- Merci, Här President. Léif Kolleeginnen a Kolleegen, Politik méi no um Bierger, d'Politik méi no mam Bierger ze gestalten, dat ass en Zil, dat sech d'Majoritéitsparteien op de Fändel geschriwwen hunn. An de Referendum vum 7. Juni ass e wichtige Schrëtt, fir dëst Zil ze erreechen.

Jo, de Referendum dëst Joer ass en historiesche Moment, well mer nei Weeër gi bei der demokratescher Abannung vum Vollek bei wichtige Gesellschaftsfroen. Esou eng partizipativ Démarche vun der Chamber, am Endeffekt, ass et an deem Mooss an deene leschte Jorzéngten nach net ginn, well mir banne mat dem Referendum d'Biergerinnen an d'Bierger direkt an d'Aarbechte vun eise wichtegste Gesetz, nämlech d'Aarbechte vun der Verfassung banne mer se domadder an.

Ech wëll nach eng Kéier och kuerz de Kontext vun den Aarbechten um Referendum hei skizzéieren. De Rapporteur huet dat scho gemaach. Mä et ass awer wichtig, fir nach eng Kéier de Kontext ze setzen. D'Chamber beschäftegt sech schonn zéng Joer oder méi, op alle Fall e Jorzéngt mat enger Neifaassung, mat enger Moderniséierung vun deem wichtigsten Text an eise Rechtssystem. An d'Koalitioun huet och an hiren Accord geschriwwen, datt se wëllt déi Verfassungsreform elo och an dëser Legislatur ofschléissen, datt mer endlech d'Aarbechte kënne fäerdeg maachen.

Ech wëll nach eng Kéier rappeléieren - ech mengen, hei ass dat vläicht an dësem Haus iwwerflësseg, mä ech maachen et awer nach eng Kéier -, ech wëll rappeléieren, datt d'Verfassung dat wichtigst, dat iewescht Gesetz ass. Et regelt d'Organisatioun vum Stat, et garantéiert eis Grondrechter an et setzt och de legale Kader, deen dann all Gesetz an all Reglement och muss respektéieren.

An, Här President, mir wëssen et allegueren, et ass e Fait, scho bal eng Banalitéit, fir et ze soen, mä eis Gesellschaft, eng Natioun, e Stat, deen evoluéiert, verännert sech. An duerfir huet dës